



一條菜瓜

今晡日朝晨頭，隔壁種菜个阿煥伯看著佢，跔跔行前來問佢講，愛食菜瓜無？黏邊佢就同佢應講好。跔等阿煥伯个屎朥尾，行到厥个菜園，行入瓜棚下，阿煥伯拿出禾鏟仔，對菜瓜蒂頭前个藤一割，該條靚靚个菜瓜，搭在阿煥伯个手頭項。阿煥伯講菜瓜打有恁多食毋去，老忒又打爽。佢攞起阿煥伯送个菜瓜，笑咪咪仔，承蒙佢恁會相惜，送分佢一條恁靚、恁得人惜个菜瓜。

講著種菜瓜，阿煥伯係老經驗。佢講，立春來就好點(diam)菜瓜仁，等佢暴芽綻筍，差毋多有手指公同搶食指攞開恁長个時，就好摺秧仔徙位來種。種个位所，最好係兼水溝壚，先打壟、打肥底再同菜瓜秧種落去，續等愛淋水淋溼來。有兜人會在瓜仔秧種落去个時節，摺瓠棚共下搭好來；有兜人係等到菜瓜藤愛上棚个時節，正臨時及及同瓠棚搭好。等到菜瓜藤上棚，天時燒暖，水淋來足，菜瓜就會開花結子，恁兜就等等收成！阿煥伯講到一條線，佢聽到像鴨仔聽雷樣。

佢毋會種菜瓜，毋過佢當好食菜瓜，乜有煮菜瓜个經驗。同菜瓜皮刨忒，淨水洗過菜瓜，同佢對半破開，再摺佢切到一坵一坵，順續同薑嫲切片、七層塔洗好準備。擰開瓦斯，杓起細細蕊个瓦斯火，同嫩嫩个菜瓜放落去，定定仔燴。燴出菜瓜味，湯慢慢仔流出來，放落一細湯匙个鹽（乜做得無愛放）。菜瓜緊煮緊軟，緊煮緊酪，再同切好个薑嫲、七層塔落下去，煮分佢滾，就係一品好食个熱天料理！菜瓜係熱天時節个菜，佢有清涼解熱个功能，煮到燒燒个菜瓜係一款好味緒，放分佢涼正來食，味緒乜當好，實在當湛斗喔！係講驚食毋飽，就同煮等个菜瓜落兜仔麵線落去，共下煮熟，無就摺屋下長(diong)有个冷飯，同菜瓜湯攪到共下，該味緒好到講毋得，包你食到啦啦滾，正經好食又耐飽噢！

今晡日阿煥伯送个一條好食个菜瓜，當當在吾个胃腸肚消化，味緒還留在吾个嘴空肚，定定仔，流入吾个心肝肚。

作者：邱一帆

☆詞彙學習☆

【跔跔】dang' dang'：專程。

【臨時及及】lim' sii' kib kib：匆匆忙忙。

【打壟】da' liung'：整理菜箱。

【擰開】zun' koi'：轉動開啟。

【打肥底】da' pi' dai'：施入基肥。

【杓起】diag hi'：扭轉打開。

【瓠棚】pu' pang'：瓜棚。

【湛斗】zam deu'：優秀。

☆文法學習☆

【係講……就……】he gong'……qiu……：要是……就……；如果……就……。

例 1：係講外背有落雨，你就愛擎遮仔出門喔！（要是外面有在下雨，你就要撐雨傘出去喔！）

例 2：係講佢無來，你就同厥作業帶轉去畀，好無？（如果他沒有來，你就把他的作業帶回去給他，好嗎？）